

FUKUSCHIMA BLUES

Da Hoffnungsschimma schimmad nimma
Strouhheim zoang se soitner
De Zuversicht voschwindt fia imma
nur's Unglück des bhoid ma
Oan drahts nochm andan weg
mia ko nix dageng macha
Sich wehrn hod überhaupt koan Zweck
olles werd zam kracha

De Lage zoagt se vogelwuid
de Zukunft wead beschissen
Auf koan Foi samma soiwa schuid
mia woins a gor net wissn
Feiern bis zum letztm Schnaufa
beim Steam a lauda Fluach
's Lebm is a Dreghauffa
Und da Doud, dea is a Ruach

Mia habm spekuliert
oba de Werte san verfoin
Mia habm uns amüsiert
iazt miaß ma dafia zoin
Da Saustoi wochst uns iwan Kopf
Mia san de letztm Bean
Bei uns riad se richdig wos
Wia in am Reaktorkern

Kim no kurz in meine Arm
Dase di no amoi gspia
Hintam Friedhof weads scho finsta
weast säng so schee wars no nia
Kim no kurz in meine Arm
Dase di no amoi gspia
Vor nix muase mi a so fiachtn
ois wia dase di volia

Drum danz ma
überm Abgrund
denn de Aussicht
is famos
Dabei grins ma
wia de Sauhund
weil mia san
schwereelos

Loß uns danzn
übern Abgrund
foi ma singad
in die Schlucht
Unsa Platzal
in da Hoi
des is scho
längst gebucht

